

Месяца июля в 29-й день

**Рождество великаго святителя
и вселенскаго чудотворца Николая**

НА МАЛОЙ ВЕЧЕРНИ

На Господи, воззвах: стихиры на 4, глас 1.

Подобен: Небесных чинов:

Ныне светло празднуем святителя и чудотворца Николая преславное рождество, от праведники бо возсия нам, от добляго Феофана и благочестивыя Нонны, великий светильник, святитель Христов, просвещает наши сердца и помышления.

Ныне, святителю Николае, душа твоя пребывает в горнем Иерусалиме со святыми ангельскими силами и во славе праведных, но свыше, святителю, и нас назирай, празднующих любовию день рождения твоего.

Ныне отчество твое, святителю, град Ликия светло празднует святое и славное рождество твое, и мы с ними купно веселящеся, вопием: ты еси, отче, похвала наша и утверждение.

Слава, глас 4:

Всечестное твое рождество, отче Николае, ангелов множество на небеси и человеческий род на земли честно ублажает, яко святитель Вышняго во святым рождестве твоем пронаречен еси, Того молити о нас не престай, молимся, яко на тя упование возлагаем, святителю Николае.

И ныне, Богородичен.

На стиховне стихиры, глас 2.

Подобен: Доме Евфрафов:

Днесь ныне, земнороднии, приимите чистоты рачителя, Духа Божественнаго приятелище, Ликиом славу и всем земным удобреніе.

Стих: Праведник яко финикс процветет:

Приидите ныне, празднолюбцы, светло торжествуем в честном рождестве великаго отца и тайнника Христова.

Стих: Насаждени в дому Господни:

Приидите, сошедшиеся с Давидом вкупе возопиим: днесь род правых благословляется, от праведных родителей святитель Вышняго нам рождается.

Слава, глас 4:

Всемирная радость, от праведник возсия нам днесь рождество твое, святителю отче Николае, иже премногия ради твоя чистоты храм Божий одушевлен явился еси и во святителех предивен познаваешися,

того молитвами, Христе Боже, мир мірови низпосли и душам нашим велию милость.

И ныне, Богородичен.

Тропарь, глас 4:

Чудное и славное рождество твое, святителю Николае, Церковь днесъ православныхъ светло празднуетъ, ибо стояниемъ ногу твою яви тя Господъ и провозвести быти светильника и учителя миряному, весь мір обогащающа и просвещающа чудесы. Темъ вопиемъ ти: моли Христа Бога спастися душамъ нашимъ.

Тропарь, глас 2:

Днесъ возсия намъ, яко солнце, торжество твое, отче Николае, ибо въ рождествѣ твоемъ дивнымъ стояниемъ ногъ твоихъ ангелы возвеселилъ еси, и люди удивилъ еси, противныя же устрашилъ еси, темже ныне и Христова Церковь украшается яко невеста, и высокимъ гласомъ вопиетъ весело: уяснися моя доброта прекрасно, приидите вернii, возвеселитесь и подънимите спасение ваше и душевное нетление, въ бедахъ скораго помощника, въ скорбехъ посетителя, въ мори обуреваемыхъ тихое пристанище, алчущихъ питателя, слепыхъ вождя, нищихъ богатство, старцевъ жезлъ, юныхъ наказателя и чистоты учителя, и вси притекающии съ верою приемлютъ исцеление душамъ и теломъ.

Слава, и ныне, Богородичен:

Вся паче смысла, вся преславная Твоя Богородице таинства, чистоте запечатанной и девству храниму, Мати позналася еси неложна, Бога рождши Истиннаго, Того моли спастися душамъ нашимъ.

НА ВЕЛИЦЕЙ ВЕЧЕРНИ

На Господи, воззвахъ: стихиры, глас 2.

Подобенъ: Кими похвальными венцы:

Кими похвальными венцы венчаемъ святителя въ чудеснемъ рождествѣ его; плотию бо въ Мирехъ суща, духовно же всѣхъ достизающа, и всю вселенную озаряюща, иже чисте того любящимъ, всемъ представателя и заступника, и всемъ скорбнымъ утешителя, благочестия столпа, вернымъ поборника, егоже ради шатания враговъ Христосъ низложи, имей велию милость.

Кими песнями похвалимъ святителя въ честнемъ рождествѣ его; нечестию противоборца и благочестию поборника, Церкве первостоятеля, великаго защитника и учителя, и теплаго пособника, злославныя посрамляюща, потребителя Ариева, егоже ради сего шатание Христосъ низложи, имей велию милость.

Киими духовными пения и песньми восхвалим святителя во славнем рождестве его, далече бо сущая провидяща и отстоящая яко близ суща, и в рождестве своем стоянием честных ног пророчествующа неложно, еже всей вселенней хотящи быти назирателя, и обидимым избавителя, царем окормителя, и связанным разрешителя, и от неправедныя смерти свободителя, и всем дарующа верным велию милость.

Слава, глас 6:

Святителем удобрение и отцем славу, источника чудес неисчерпаемаго и верным заступника великаго, сошедшеся, о празднолюбцы, цветы добродетелей вземше, песненными похвалами воспоим, глаголюще: радуйся, в Мирех Ликийских рожденный и всему миру вожделенный, верным хранителю и наместниче честный и столпе непоколебимый. Радуйся, светильниче всесветлый, иже мирский концы просвещаяй чудесы. Радуйся, печальным Божественное радование и обидимым теплый поборниче. И ныне, всеблажене Николае, не престай моляся Христу Богу о чтуших верою и любовию приснорадостную и всепразднественную память рождества твоего.

И ныне: Кто Тебе не ублажит:

Вход. Прокимен дне. Чтения святительских.

На литии стихиры, глас 2:

Отче Николае, аще и Мирская страна израсти тя, но мір весь, иже тобою просвещенный, мирными благоуханием и чудес множествы, взыывает похвальными песнями, и спасшияя тобою неосуждени, сущими в Мирех, и мы поюще вопием: моли спастися душам нашим.

глас 4:

Отче Николае, закона судьбами, яко сад при водах насажден бысть и в дому Божием преславно процвел еси, и всех верных чудесы предивными возвеселил еси, темже и ныне прииди, отче, посреде нас невидимо, и озари нас от Бога данною ти благодатию во светлом сем торжестве, в честном твоем рождестве, богоносе Николае.

глас 8:

Доблестей твоих, преподобне отче, плоды просветил еси верных сердца чудесными блистанием. Кто бо слыша о сем не удивится, яко во святем рождестве твоем стоянием ног твоих предивен и непреклонен явился еси, досточудне Николае. Темже и нас, поющих и хвалящих тя, присно избави от враг видимых и невидимых твоими к Богу молитвами и спаси души наша.

глас тойже:

На хвалу потекл еси Господню, Николае, во временней жизни, и Той тя прослави на небесней истинней жизни. Темже дерзновение стяжав к Нему, моли спасти души наша.

Слава, глас 6:

Днесь верных собори сошедшеся, воспоеи вкупе согласно предивного отца святителя Николая торжество, зачатие бо его честно, и рождество его свято, и во младенчестве его дивная всем явишася, темже вопием ему: сосуде святоизбранный, столпе и утверждение Церкве, Царствия наследниче, не премолчи вопити о нас ко Господу.

И ныне, Богородичен: Творец и Избавитель мой:

На стиховне стихиры, глас 5.

Подобен: Радуйся, Живоносный Кресте:

Радуйся, явивыйся деннице пресветлая пребезначального света Владыки, радуйся, заре тайного света, иерарше Христов Николае, предвари и подвигни пречистыя твоя молитвы о нас ко Господу, празднующих верою память рождения твоего, во еже избавити нас от всякия напасти и лютыя наша болезни исцелити. Отче, тебе бо заступника имамы и умильно с верою вопием ти: молися о нас Христу Богу даровати нам велию милость.

Стих: Праведник яко финикс процветет:

Радуйся, главо преосвященная и Богу рожденная, и от праведных родителей якоже второй Самуил в дар Богу возложенный, и явился еси честное добродетелей жилище, бодрое правило непорочного священства, пастырю добрый и пресветлый, превеликий светильниче, иже победоподобное носяй имя, требующих милостиво прошения исполнявши, приклонялся к молитвам молящихся. Граде спасенный и одушевленный, притекающим к тебе избавителю готовейший, всем верою поющим твое преславное рождество, даруй нам велию милость.

Стих: Насаждени в дому Господни:

Радуйся, честный грозде зрелаго плода, от праведники ныне явился еси яко пресветлая заря, и всем нам предивен познаваешься, отче Николае, честный уме, Троицы честный сосуде, столпе церковный, верным утешение, побеждаемым помошь, и ныне во светлом торжестве рождения твоего богоприятными твоими молитвами разори напастей и скорбей наших тьму, святителю Николае. Ты бо еси истинный и любезный пастырь и отец наш, и мы овцы пажити твоим, и в помощь тебе призываляем, даруй нам велию милость.

Слава, глас 2:

Приидите, христоименитых людей собор и всех верных сословие, днесь ныне в лице ставше, светлым гласом возопиим: блажен еси

Феофане, яко такову отроку быв родитель, хотящаго родити словом учения многих ко спасению. Блаженна ложесна твоя, Нонно, имиже носила еси, и красна сосца твоя, имиже воздоила еси хотящаго напитати душетленным гладом таущия. Блаженно отечество ваше, град Ликия, и вся окрестная его. Но помолимся вами блаженная, еже молити его о нас, да испросит у Христа мира мірови и душам нашим велию милость.

И ныне, глас тойже: О, чудесе новаго:

НА УТРЕНИ

На Бог Господь: тропарь святаго. Слава и ныне, Богородичен воскресный.

По 1-м стихословии седален, глас 1.

Подобен: Гроб Твой:

В Мирех рождъся, святителю, миром разумно духовным явися помазан, отче Николае, темже миры чудес твоих мір облагоухал еси, миро приснотекущее проливая, иже мирными твоими благоухаемыми чудесы почитающих торжество твое и нас, раб твоих, обогати.

Слава и ныне, Богородичен:

Всем Творца, Бога же и Содетеля, Всенепорочная, Чистая, Духом Божественным в ложеснах заченши и тления кроме родила еси, Егоже славяще, Тя воспеваем, Дево, яко Палату Царя всех и міру заступление.

По 2-ом стихословии седален, глас 8.

Подобен: Премудрости:

Источник чудес от Бога явился еси, мудре Николае, темже, отче, в рождестве твоем дивен явлься, всем бо верным источаеши спасения воды, от Бога благодать прием, темже дерзновение имея к Нему, моли о чтуших верою и любовию память рождества твоего, всеблаженне Николае.

Слава, и ныне, Богородичен:

В кал греховный впадох и нет мне постояния, люте погрузи мя буря согрешений, но яко рождши Слова Единаго, Человеколюбца, на мя, раба твоего, призри и избави всякаго греха, и страстей душетленных, и всякаго озлобления льстиваго врага, Богородице неискусомужная, моли Христа Бога грехов оставление подати ми, Тя бо имам надежду, раб Твой.

По полиелеи седален, глас 5.

Подобен: Собезначальное Слово:

Ныне, отче святителю Николае, отечество твое град Ликия светло радуется, и вся Вселенная день рождества твоего честно празднует. Темже и мы днесъ, во храме твоем сошедшееся, вкупе с ними

похвальная приносим ти, глаголюще: радуйся, отче Николае, всех покрове и заступление.

Слава, и ныне, Богородичен:

Неискусобрачная Невесто, Приснодево, со святители непрестанно восхваляем тя, яко Тобою нам величия сотвори Сын Твой и Бог Превечный от Отца, Иже в ложеснах Твоих вместитися изволивый, да от лести свободит род наш.

Степенна 1-й антифон 4-го гласа. Прокимен, глас 4: Праведник яко финикс процветет и яко кедр иже в Ливане умножится. Стих: Насаждени в дому Господни: Евангелие от Матфея, начало 11.

**По 50-м псалме стихира, глас 6. Днесь верных собори сошедшеся.
Писана на литии Слава.**

Канон Пресвятой Богородицы со ирмосом на 6.

Канон святителю и чудотворцу Николаю, глас 3.

Песнь 1

Ирмос: Дивно, славно творяй чудеса:

Дивен и славен еси, Господи, творяй чудеса, разделивый море, и воду из камене источивый жаждущим людем, напои убо, Блаже, и мене росою Твоей благодати, да возмогу воспети угодника Твоего преславное рождество.

Дивное и славное рождество твое, святе Николае, от любви душевныя хощу похвалити, но недоумением содержим, боюся трепеща, зане вем, яко не красна похвала во устех грешников. Но обаче, дерзая на благоутробие твое, славлю святое твое рождество.

Дивна воистину и славна, святителю, память рождения твоего, яко звезда утренняя посреде облак, и яко солнце сияя на Церковь Вышняго, и яко дуга на облацах славы, тако сияет хвала твоя на тверди церковней, отче Николае.

Дивного и преславного святителя на преславное рождество христоименитии стекшеся, усердно соберитеся и славу Господеви воздадите, яко дарова нам такова пастыря и учителя нелестна, и путеводителя, и от бед свободителя, еретиком же посрамителя.

Богородичен: Дивна и преестественна тайна рождения Твоего, Богородице, кий слух слыша не удивится Богорождению Твоему, яко во утробе Своей Создателя всех нетесно вместила еси, и паки Дева пребыла еси.

Песнь 3

Ирмос: Неплодная душа:

Неплодну имам душу аз окаянный, како тя могу похвалити, святителю; воистину ты, отче, плод благохвальный, душу мою плодоносну покажи, да возмогу воспети святое твоё рождество.

Неплодна быста родители твоя по рождестве твоем, святителю Николае. Естеству убо поведающу, яко не могут другого такого родити, добродетельми же яко Авраам плодна и верна быста, того ради и мзду о вере своей от Бога тебе прияста.

Неплодных чреспл честное прозябение, святителю, слыша, кто не удивится, рождшуся бо тебе, святе, воистину дивная о тебе яви Господь, trem бо часом неуклонно тебе стоящу на земли, идеже хотяше омытися, чудне Николае.

Богородичен: **Неплодных ложесн Рождение, Пресвятая Владычице, но рождши нам Христа, Плода Безсмертнаго, питающаго всяко создание и смотряющаго всю тварь, Богородительнице.**

Седален, глас 5.

О блаженная версто и благословенное супружество прекрасного душою Феофана и боголюбивыя Нонны, Божественным бо желанием совокуплени быста, и израствиша нам прекрасного плода, чудного Николая, не токмо бо яко цвет шипка или крина при исхождении воды или стебло ливаново во дни жатвы, но истиннаго плода реку, отца сирым и вдовицам заступника, богатство нищим и болящим здравие и утешение, и сущим в богатстве окормление, старости подпор и юности обучителя, благочестия окормителя, еретиком же и бесом губителя. К немуже мы ныне возопии: отче святителю Николае, моли спастися поющим тя.

Слава, и ныне, Богородичен:

Блаженна ложесна Твоя, Богородительнице Дево, яко ширши Небес явльшася, словом бо составльшаго тварь во утробе Своей безсеменно имела еси, и во объятиях Своих нетрудно носила еси, тем молим Тя, Всеблаженная, еже молити от Тебе рожденного Христа, Бога нашего, во еже спастися поющим Тя.

Песнь 4

Ирмос: *Покрыла есть небеса:*

Покрыла есть яко облак любы твоя и благодать твоя, юже имаши от Бога, святителю Николае, всех призывающих имя твоё святое, всюду бо неоскудно подаваеши и коегождо прошения исполняеши. Приди и ныне посреде нас невидимо и посети нас, озлобленных грехами, любовию празднующих пречестное твоё рождество.

Празднуется и украшается рождеством твоим, святителю, яко монисты, Церковь Христова, и невестски светло одевается и красуется, веселяся и вопия радостно, глаголя: приидите и видите желаемаго

мною небеснаго гражданина и служителя Христова, днесъ рождася от благоверны родители.

Память рождества твоего, отче святителю, всем человеком бысть веселье. Покрый нас, отче всечестне, призывающих тя с верою и празднующих честно торжество праздника твоего, святителю Николае.

Похваляему бо праведнику возвеселятся людие, якоже рече Писание. Днесъ ныне мы грешнии, в рождестве твоем, отче Николае, радуемся и веселимся духовне, Христа славяще, Иже тебе таковую благодать даровавшаго, яко Того хваления исполнъ земля.

Богородичен: Пресвятая Богоневесто, рождшая Христа, Правителя и Содетеля всем, немощствующую душу мою исцели и настави мя на деяния благая, да всегда славлю Тя Преблагословенную.

Песнь 5

Ирмос: На земли Невидимый явился еси:

На земли, отче святителю, явися верным твое святое рождество, воистину любезное торжество, якоже бо ливан в кадильнице или яко маслина износящи плод, тако нам память рождества твоего, отче милосерде Николае.

На земли днесъ ныне, святителю, познан бысть и, яко от Бога познан был еси, прослави бо тя Господь в рождестве твоем, ибо стоянием честных ног твоих являя хотящее быти на тебе дарование.

На земли ныне Церковь православных веселится, святителю Николае, и ликует с чады своими в памяти рождества твоего, милосерде, и вопия глаголет: уяснися ныне доброта прекрасно и никогдаже угаснет.

Богородичен: На землю во чрево Твое, Чистая, яко дождь на руно сниде Господь и Бог наш, и от Твоих пречистых девических кровей плоть прием и чудодействова, и пострада, и взыде на Небеса, с Собою возвышая праотца.

Песнь 6

Ирмос: Глубина страстей воста на мя:

Глубина страстей воста на ны и буря противных ветров, но предвари нас, отче святителю, и разори сопротивлежащий на нас совет лукаваго, и лукавых человек стремления, хваляющихся о злобе своей, спаси ны от них, милосерде Николае.

Глубине богатства Божия дивитися суть должно, дела же Божии славити зело есть лепо, памяти же святых чтити вельми есть полезно. Почтим убо и мы, братие, и возлюбим возлюбленного Богом святителя Николая, како во святем младенстве его дивная о нем показа Бог.

Питаше бо ся, но не тако, яко же обычай детем, в среду же и пяток единою касашеся, и то к вечеру, от леваго же сосца отнюд не ссаше, прознаменуя десное жития его.

Глубиною мудрости промышляяй о всех Господь, прежде противны ветров тишину уготовляет, на Ариев убо плевел огнь вжигает, сего дивного реку и преславного святителя Николая рождество являет, пророченном от апостола Павла, еоже предуведе Бог, сего и предъизбра, и оправда и прослави.

Богородичен: Глубине таинству Богорождения Твоего кто не удивится, Пресвятая Дево Владычице; веков бо Творец вселился в Тя, и плоть от Тебе приим умну и словесну, вся люди обожи.

Кондак глас 3.

Подобен: В Мирех, святе:

В Мирех рождься, святе Николае, от благородна корене, яко благоплодна ветвь прозябл еси, исполнь бо быв Божественных даров, яко солнце зарями весь мір чудесы просветил еси, сего ради прославляем тя, яко ученика и таинника Божия благодати.

Ин кондак глас 3.

Яко звезда пресветлая просиял еси, блаженне Николае, посреде Ликии града от праведники родился еси, отче, и в честнем рождестве твоем чудна и славна тя показа Господь, и во святем младенстве твоем дивная явлена быша о тебе, Троицу бо проповедал еси трех часов стоянием честных ног твоих на земли в час рождения твоего, и от сосца деснаго питавшеся, от леваго же никакоже, в среду же и в пяток единою, токмо во время вечернее, и оттого, отче, познан был еси воздержания нелестное правило, и яко имаши быти велий таинник Божия благодати.

Икос:

Приидите ныне с нами, братие, и купно духовне возвеселимся во святем торжестве Богоноснаго отца нашего святителя Николая, и прославим преславно рождшагося, и от утробы освященного, и Божественного Духа приимшаго, и Святую Троицу в час рождения своего стоянием ног своих проповедавшаго, и всех человек удивльшаго, хваляще святое и чудное рождество его. Любовию и правостию сердечною благодарная к нему сице рцем: Радуйся, от матерних ложесн Богу возложенная и от Него усвоенная и освященная главо, сокрушивый проклятому сатане главу. Радуйся, предъизбранный и освященный сосуде и Богу возложенный и возлюбленный. Радуйся, царем правоверным помоще и окормление, и на враги победа и одоление, и Православию утверждение. Радуйся, в Духа Святаго облеченный и на благодеяние благочестивым поданный.

Радуйся, нечестивых потребителю и на страх их явленный. Радуйся, бесом прогонителю и еретиком обличителю. Радуйся, яко во святым рождестве твоем дивен всем познанный, яко имаши быти великий таинник Божия благодати.

Песнь 7

Ирмос: Трие отроцы в пещи:

От Троицы Бога проповедал еси, чудне Николае, темже и почести от Него венец приял еси, блаженне, и ныне в торжестве твоем усердно призывающих тя не забуди нас, раб своих, но свыше назирай, тя бо имамы крепка молитвенника.

Скрижаль в сердце своем от младенства, отче Николае, стяжав дивных добродетелей, написанну безсмертным пречистым перстом Христа Бога нашего, моли Его о нас, во еже написанным нам быти в книзе животней, святителю отче Николае досточудне.

Во святым рождестве твоем, святителю отче, Богом познан был еси и Бога познал еси, и весь бысть Божие жилище, весь явися орган духовный, возглашающ всяку добродетель Богодухновенных пений, спасения сказания и доброту являя Небесного Царствия, святителю Николае.

Богородичен: С Богом Заступнику Тя стяжахом, Ты бо Божия Мати бысть Творца и Содетеля, и наше воображение приемша Всенепорочная, и сие спасша от тли и смерти, и славою Божественною прославльшаго.

Песнь 8

Ирмос: Ангельми немолчно:

Ангелы дивятся, видяще преславная в час рождения твоего, отче Николае, человецы же радуются, приемлюще тя яко своего благодетеля и к Богу молитвенника неуклонна, всем бо явился еси радость спасения, милосерде Николае.

Кто не почудится или кто не прославит имене твоего, отче святителю, слыша на тебе выше закона естественного бывшая знамения в рождестве твоем, и тем яви тя Господь светильника всему миру, во святым же младенстве твоем у матерних соседей показа тя изрядна и искусна, тем воистинну воздержанию нелестный учитель явился еси, святителю Николае.

Вторый Предтеча на земли явился еси на обличение беззакония, отче Николае. Ов бо обличи Ирода беззаконновавшаго, ты же, отче, вся ереси далече от Церкве отгнал еси и вся соблазны и беззакония, яко хвастия, огнем ревности своея попалил еси, верных же утвердил еси, милосерде Николае.

Богородичен: Дивлюся, святая Богоневесто Владычице, таинству Богорождения Твоего, всех бо Содетель в Тя вселися, и все человеческое естество на Небеса вознесе. Прибегающих под кров Твой приими и спаси ны, Благодатная Владычице.

Песнь 9

Ирмос: Благословен Господь Бог Израилев:

Благословен еси Боже о всех, яже твориши, идже бо хощеши, тамо побеждается естества чин, яко же и ныне в рождестве святителя Твоего выше закона естественного верным твоим дивная и пречудная явил еси, того молитвами, Христе, направи на путь мира.

Благословенна тя Богом, всем, отче Николае, благослови убо и мене, поющаго святое рождество твое, и руку помощи простри, и приведи к тихому пристанищу покаяния, яко да всегда славлю тя, отче Николае.

Аще и много беззаконновах аз окаянный, не отступаю надежди покрова твоего, отче Николае, всегда прибегаю и на тя надежду мою полагаю. Тем в нынешнем настоящем торжестве, во святем твоем рождестве радостно вопию ти: ты мя, отче, избави от всякия скорби, и бед, и печалей, елика бо хощеши, и можеши.

Блаженне и Богоносе Николае, виждь тесноту души моей, како враг мой подвиже на мя брань на всяк день и не может истощити тулу стрел моих, но присно ураняет мя и почти ми не дает, аз же изнемогох, но ты, отче, сокруши козни его молитвами своими, яко да прием помошь твою святую, непрестанно славлю тя.

Богородичен: Никтоже прибегаяй под кров надежди Твоей, Пресвятая Богоневесто, тощь исходит, но всяк просияй приемлет скорую Твою помощь, юже и мне подаждь, Отроковице, поющему пресвятое Твое Рождество.

Светилен.

Воистину шлем и оружие на диавола непобедимое ты еси, отче Николае, от Бога явлен еси, христианом же поможение и утверждение, иерархом удобрение, в бедах же притекающим к тебе скорая помощь и заступление, святителю Господень. (дважды)

Слава, и ныне:

Облаче превышший небес, радуйся, искапающий нам каплю душеспасительную, Богородице, Ты Всеблагая, подаждь от Бога царем нашим победы на враги и междуусобия бурю утиши, елика бо хощеши, вся можеши, яко Мати Господня.

На хвалитех стихирь, глас 4.

Подобен: Дал еси знамение:

Дар благоприятен, от родительных рук Богу возложенный, и от Него усвоенный, и на пользу верным поданный, святителю Николае, темже в тебе упокоися благодать Пресвятаго Духа, славне, беззлобием возрастиши тя и мудrostию украсивши.

Днесь память рождества твоего, святителю отче Николае, яко солнце нам Богоносия возсия, лучи богатых дарований просвещающи чтуших тя и верою блажащих, мглу же лютых отгоняющи, и прошения верным исполняющи, тем тя, досточудне, почитаем.

Божественную благодать от Бога приял еси, святителю Николае, юже прием свыше, и нас назирай, празднующих любовию честное твое рождество, и подаждь от Бога церквам единомыслие, и царем нашим победы на враги, и міру умирение, и земли нашей благоплодие, и душам нашим велию милость.

Слава, глас 2:

От корене благаго благий прозябе плод, иже от младенчества освященный, и якоже Самуил в дар Богу возложенный, отче святителю Николае, Божиею бо благодатию паче, нежели млеком воспитанный, тем и на гору добродетелей взыде, преочищенну душу стяжав, и разум имея присно к Богу, небесное бысть жилище Духа, Христова обитель явися. Того, блаженне, моли о нас, еже спастися душам нашим.

**И ныне, Богородичен: глас тойже: Яко плодовита маслина, Дева:
Таке славословие великое и отпуст.**

НА ЛИТУРГИИ

**Блаженны. Прокимен, Апостол, Евангелие и причастен все
святительское.**